

四庫全書

集部

欽定四庫全書

集部

元詩體要卷三

四

詳校官中書臣瞿照

助教臣常循覆勘

總校官庶吉士臣何思鈞

校對官學正臣常循

謄錄監生臣龍翔

謄錄監生臣鄧以伊

欽定四庫全書

元詩體要卷三

明 宋公傳 編

七言古體

上繼學王公

黃清老

大風捲地沙塵昏十日不得一出門眼中俗子浩於海
思欲一見雲中君雲中之君玉為節鷹冠峩峩照晴雪
振衣驚落琪樹花片片人間作明月有時霹靂生風雷
松聲曉落青崔嵬衆芳收雨作春色瑤草綠遍三蓬萊

有時筆端吐光怪，干將生花玉龍蛻。
廣寒天上間步虛，萬壑千崖起秋籟。
嗟余困學無所成，仙家幸識黃麒麟。
願從輞川覓詩法，白鷗飛入南山春。

賦得金盤露送宋顯夫僉事之山南

程益

鳳城仙客來揚州，便當解此千金裘。
丹丘夜出瑤瑤甕，洞庭春泛垂華舟。
看花路入竹西寺，吹簫人倚橋邊樓。
船頭對月且獨飲，錦袍明日金陵遊。

送黃五舅得武陵校官還辰州寓居省侍

揭傒斯

寧上山頭種禾黍莫向他鄉作羈旅山田得雨尚有年
他鄉憔悴何人憐一身千里家何在全家更在沅湘外
獨樹鷄鳴楓葉飛荒村鴈沒蘆花碎親在窮邊望子還
子在長途衣復單居無寸田出無僕明年作官當食祿

送人從軍

妙年好文仍好武一旦從軍氣如虎彎弓已作滿月圓
拔劍更逐回風舞悲笳四起旌旆愁蒼山偃蹇黃雲浮
陣前手繫降王頸馬上仍懸猛將頭復讎義大身命小

順天將軍古來少一戰功成六合清不用黃金印如斗

送友人赴陝西作縣

貢師泰

角聲吹起滿城雪北風蕭蕭嘶小驥銀瓶細溜葡萄熟
三疊歌殘人欲別長安西去山崖我野曠春濃詩思多
縣深花拂琴絲和小吏呼籌衙又過莫忘都門送時節
楊柳枝寒不堪折

送龍子高之湖南帥府

沙碧虛

渥洼水中天馬駒一日一行千里餘郎君磊砢亦如此

俊才往往為時需去年攜書謁衡岳遙見秋空飛一鷲
大藩諸侯重文章致身忽入芙蓉幕青春奉檄升高堂
綵衣婉婉秀眉長捧觴攜親為親壽獨騎匹馬行三湘
湘中故人候君至爭採蘋花寄春意定王臺畔煙雨深
楊柳青青已垂地我尋舊隱東山阿望君不見思如何
江頭春水渺相接日暮碧雲天際多

送婁伯高遊吳

牟獻之

桃花水暖清明前長堤柳色青如煙男兒年少重意氣

春風買醉吳江船西湖三月春更好笙歌錦繡神仙島
紫燕樓深翠黛閒碧羅天淨楊花老興亡往事置勿論
千金不惜酬歌尊酒酣莫作後庭曲遊人思斷江南魂
去去知君訪陳迹吳水吳山青歷歷花殘鈿碎館娃空
春草年年為誰碧君行正樂我為愁白髮送君思舊遊
平生漫浪無似我努力功名須黑頭

送周草牕尊師歸廬山太平宮

成廷珪

匡廬之山仙所居銀河倒蘸青芙蓉三千里路昔一往

十八社友今何如向來匡君結廬處至今海月懸高樹
水流花落春復春洞府蒼茫隔雲霧西風瀟瀟吹短衣
賣藥修琴不歸去潯陽潮落海欲枯幾時再得麻姑書
桂風不跨林下虎回仙肯顧盤中魚幸留神物守丹鼎
喜近弟子迎颺車世間信有揚州鶴看汝乘之上寥廓
晴牕須理白雪絃爽氣仍開紫霞閣袖中寶劍且藏鋒
彭蠡小龍方睡着

送華山隱歸西湖

王士熙

方士求仙入滄海十二城樓定何在金銅移盤露滿天
琪樹離離人不採軒轅高拱聖明居羣仙真人左右趨
青牛谷口迎紫氣白鶴洞中傳素書珊珊鳴佩星辰遠
寂寂珠庭雲霧虛脩髯如漆古仙子玉林芙蓉染秋水
九閼高寒不可留歸去西湖種蘭芷山頭宮殿風玲瓏
玄猿飛來千尺松閒房誦經鐘磬響石壁題詩苔蘚封
欲向君王乞祠祿安排杖屨來相從

送祝丹陽赴武當

楊維禎

武當之山上參天上有天帝居其顛陰陽蔽虧藏日月
草樹蒼蔚含雲煙六丁開山鑿空翠萬神扶棟飛脩椽
金門眈眈守龍虎玉佩纚纚羅仙人人間塵俗不易到
我常夢想思攀緣嗟君此行非偶然冷風吹至虛皇前
手持御香謁帝所口漱瓊液哦靈篇蒼龜巨蛇出神怪
朱鳳白鶴相後先帝命青童授寶訣谷神不死真玄玄
却披羽衣謝仙友笑視浮世三千年

奉寄翰林鄧侍講

范梈

曩承持節江之東騎鯨再上蓬萊宮蓬萊仙人歌白鶴
聲落五湖煙雨中世間爵祿不易致何獨去就如飄風
朝廷禮樂須制作六經隱義資發蒙論思廟堂集耆碩
啓沃寧讓前諸公閉門讀書古都市四輩冠蓋方隆隆
我生生長在窮谷那有文字爭人雄謬蒙引喻百僚上
負祿府署慚無功一別十年還有五昔者少壯今成翁
誰知復客七閩下隔二千里來詩筒羸軀頓醒瘴癘惡
賴以慰此心沖沖越王城南浪自白越王城西花正紅

贈歐陽羣玉還鄉

歐陽玄

歐生手持歐公誥欲謁歐鄉玉堂老子前年勇退歸
自謂京華迹如掃今年抱病萬山中鋒車數來催就道
歐生相遇黃鶴磯我病何由展懷抱名鷹奮翅望霄撐
老驥垂頭齟霜草眼前趨向已兩途安得瑰辭贈君好
迴鸞到手光五彩坐覺虹蜺貫晴昊國家恩數不易得
文獻子孫當自保瀧岡柏桂少封殖焦陂荷花久枯槁
高堂集古散四方而我什襲傳家寶

寄雪竇寺生書記

印秋海

清泉白蘆八月秋寬鞋瘦策十日遊石牀風冷夜不寐
水絲繞指白雪流身名杳杳雲間鷓世事紛紛蕉下鹿
雨晴春暖即相尋千尺巖頭看飛瀑

有懷梁仲經父

楊奐

美人熒熒在何處海濶天低隔雲霧珊瑚零落芙蓉空
咫尺相望迷去路翠輦金輿雙鳳凰風吹環珮聲琅琅
壺觴狼籍事已往一目萬里愁茫茫劉郎竟是誰家客

歲晚霜華林葉赤美人熒熒在何處
鴨綠江頭江月白

神州八景

太液秋風

一鏡拭開秋萬頃碧天倒浸琉璃影
寒飈夜卷雪波去
貝闕珠宮黛光冷三千歌棹搖綠烟
濕鬟吹墮黃金蟬
琪樹涼颼紅鯉躍袞龍正宴瑤池仙

瓊島春陰

一峯亭亭湧寒玉露華不墮瑤草綠
朱樓千尺星漢間

天風吹下笙韶曲萬年枝上榭葉滿小鳳悵悵繞龍管
金根曉御翠華來三十六宮碧雲暖

居庸疊翠

斷崖萬仞如削鐵鳥飛不度山石裂崖峩老樹無碧柯
六月太陰飛急雪寒沙茫茫出關道駱駝夜吼黃
征鴻一聲起長空風吹草低山月小

金臺夕照

危坡十二青雲梯老樹偃伏猶躬圭長裾已曳星辰去

殘陽猶掛盧溝西
召南二百年宗社
一日黃金重天下
精躔寶氣夜不收
又見斷霞明朔野

盧溝曉月

長橋彎彎眠海鯨
河水不濺水崢嶸
遠雞數聲燈火杳
殘蟾猶映長庚橫
道上征車鐸聲急
霜花如錢馬鬣濕
忽驚沙際金影搖
白鷗飛下黃蘆立

西山積雪

凍雀無聲庭檜響
冰花洒簷大如掌
平明起視巖壑間

插天瓊瑤一千丈夕陽微漏光
嗟我倚闌更覺爽氣多
雲間落葉有徑否想見樵叟披青蓑

玉泉垂虹

雪波碧擁千崖高落花點點浮寒瑤
日斜忽有五采氣
飛上太空橫作橋古寺殘鐘塔鈴語
回首前村猶急雨
輕綃欲剪一幅秋又逐西風過南浦

薊門飛雨

黑雲如鴉漲川谷雷踴電躍風折木
半天萬點捲海來

森森映窻如銀竹鳳城無數笙歌樓珠簾半捲西山秋
誰知羈客家萬里一燈正擁寒衾愁

長短句體

長短句者古歌辭之類其語峭絕頓挫其音高下抑
揚有波瀾開合之勢流動變化莫測其涯涘今取麗
而不浮竒而不僻怪而不俚參差而不亂者列之篇
中

長風沙

揭奚斯

長風沙風沙不斷行人嗟行人嗟奈君何南風正高北
風起大船初灣小船喜移船更近大船頭不獨風沙夜
可憂但祝行人好心事長江何處是安流茅屋參差數
株柳平時尚置官軍守青裙老嫗詫鮮魚白髮殘兵賣
私酒魚賤可買酒可沽他人心事知何如

居庸關

陳孚

車稜稜石确确車聲彭彭鬪石角馬蹄蹴石石欲落不
知何年鬼斧鑿僅與青天通一握上有藤束萬仞之崖

下有泉噴千丈之壑太行羊腸蜀劍閣身熱頭痛縣度
索一夫當關萬夫却未必有此竒巘崿吾皇神聖混地
絡烽火不紅停夜柝但有地險今猶昨我扶瘦筇立倦
脚欲扣往事雲漠漠平沙風起鳴凍雀

別離情

貫雲石

吁別離之苦兮蒼梧之野春草青黃陵廟前春水生日
暮湘裙動輕翠脩竹亭亭染紅淚又聞垓下虞姬泣斗
帳初驚楚歌畢佳人閣淚棄英雄劒血不銷原草碧何

物謂之別離情肝腸剝剝如銅聲不如斫其竹剪其草
免使人生為情老

送趙履道虞叔常還江右

揭傒斯

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鶴磯頭望君庾公
樓上

出門別親友

陳孚

傳君漢水浮鴨之翠杓聽我嶧山栖鸞之綠桐男兒拂
衣出門去龍泉三尺光如虹君不見磻溪鶴髮釣魚者
偶擲漁竿來牧野白旄麾開炮烙烟桓圭朱芾侯青社
又不見南陽卧龍人不識一朝佐漢坐狼石羽扇輕搖
蛇鳥驚火精敵燄天西極旗亭四月柳如藍紫騶嘶風
黃金驟豈無扣牛歌亦有捫蝨談天生菟岩萃嶺骨蒿
菜槁死誰能甘我欲登泰山扶筇歛天關東溟若木如
可攀手弄日月青雲間我欲渡黃河赤脚凌秋波水仙

樓閣銀嵯峩徑叱海若咎蛟鼉停君翠杓聽我綠桐真人開天六合同風騶虞鳳凰飛舞鎬宮有線五色獻于重瞳補舜衣裳山龍華蟲虎豹九闕兮不可以達吾則脫冠歸來兮丹丘之青峯長揖二三子目送西征鴻

陳雲岫愛騎驢

真山民

君不學少陵騎驢京華春一生旅食長悲辛又不學浪仙騎驢長安市淒涼落葉秋風裏却學雪中騎驢孟浩然冷濕銀鞵敲吟鞭梅花溪上日來往身迹懶散人中

仙有時清霜松下路松風蕭蕭驢耳豎據鞍傲兀四無人
牧子騎牛相爾汝勸君但騎驢行路穩姑徐徐九折
畏途鞭快馬年來曾覆幾人車

送人之四明效揭翰林長短句

金本仁

百官山高嵯峩梁湖渡藏龜鼉鄉巫昔日迎婆娑中郎
八字題曹娥君今甬東去正向江頭過船頭滿載上虞
酒船尾聽唱明州歌明州三佛地昔者我曾去記得舟
人說鄉語烏撒飯箸魚羹阿婆燒火新婦烹有錢我亦

買漁具築室海陽依汝住

贈別 張子素

送君一出江之湄為君一典身上衣臨風沽酒與君飲
欲別不別心依依筇櫓八尺兩芒屨倏忽歸來倏忽去
輕帆閃閃不可留極目青山渺烟樹今日與君盟白鷗
明日與君風馬牛人生得喪何草草秋月春花為誰好
江湖漂泊真可憐我幸少年君已老君已老可奈何故
山石室高嵯峨我何如歸來耕釣老其下日日聽我春風

歌

贈友人

鄧牧心

我在越君在吳攜書邀我遊西湖我還吳君適越遙憶
三江共明月明月可望佳人參差與君攜手西湖上相
思空誦停雲詩知君去掃嚴陵墓祇把清尊酌黃土浮
雲茫茫江水深感慨何勞弔今古孤山山下見陳實連
騎東來踏春色湖邊千樹花正繁莫待東風吹雪白有
酒如澆有肉如陵鼓趙瑟彈秦箏與君長醉不用醒何

必千秋萬歲名

贈天台潘秋崖山人

戴帥初

老潘雙眸如紺珠帶以秋陽朝露之清腴山形水態出
沒千百變經君指顧不得藏錙銖我昔少年好狂走風
殄雨沐逐逐忘朝晡至今卧遊想其處但覺雲濤烟嶂
千里行須臾匡廬春風鍾阜雲彭郎之磯大小飛來孤
秦淮震澤洞庭野峨眉縹緲南接五嶺東蒼梧歸來把
鋤剡山下一竿釣月賀家湖籠鷹樞馬困羈束每逢風

鳴草動驚號呼聞君談論到骨髓寒衣振迅恨不六翮
生形軀尋牛卜龍古亦有君家子孫三葉傳青烏人言
河流可移山可鑿秦皇漢武已類愚公愚相看徘徊山
南山北一百里勝處忽然開酒壺問渠劉伶一童一鋪
欲何用且可從我日日醉倒黃公壚

方寸鐵為鐫字盧仲章賦

董良用

方寸鐵百鍊鋼吹毛劍鋒秋水光鐫勒妙擬邵竹房倒
雍文連環鈕通侯纍纍懸肘後伏龜趺蟠螭首頌德紀

功垂不朽鐵名已著霜滿顱復得鐵業傳二雛勿劉元
祐黨勿刻諍癡符何如往補石經缺萬古六書存楷模
天下英髦知所趨伊誰之力丹丘盧

醉歌贈卜者陸華之

丁復

雲心子陸農師之子孫老來賣卜錢塘門搜玄抉微擘
混淪進退五緯扶兩輪皞父及芒兒束手就律呂不敢
差毫分前身定是張博望老樹倒騎上昆侖投杼機上
女飲牛河畔人與之細說天地根却來人世三千歲君

平骨朽呼不聞功名富貴無足云祇談禍福開盲昏得
錢沽酒和天吞赤城有狂客十年江海看浪翻歸來黃
塵中拭目驚見君抵掌一長笑各拂頭上巾昔時綠髮
滴可染祇今雪繭纒吳盆少者忽已老長者不復存政
須日日醉倒湖邊尊尊已倒還再沽不愁黃金盡但恐
清旦無舉手招羲和低頭喚天吳勸爾勿東逝止爾毋
西徂西徂不可止東逝無窮已囑付酒家兒明當復來
此

寄友 端景元

烟蒼蒼濤茫茫洞庭杳杳天一方
上有七十二朶之青芙蓉
下有三萬六千頃之白銀漿
中有美人兮佩服金鷲鷲
乘龍車鳴月璫天風吹我登其堂
飲我以金莖八月之沆瀣
視我以崑丘五色之琳琅
浣爾精滌爾腸洒然心地生清涼
非獨我以眇四極輕八荒
抑且可以老萬古
凋三光久不見兮空慨慷
久不見兮空慨慷

梁貢父學士江行阻風圖 鄧文原

匡廬枕長江彭蠡居上游我幼不識風濤怒但喜青山
綿亘急櫓鳴中流老來行道增百憂山有虎兕水次多
蛟蚪梁公示我江上圖空齋颯爽回高秋想見飛廉簸
蕩驅陽侯雷鼓動地萬貌貅連檣十日不得發何異駿
馬伏櫪鷹在韝行人徼福古祠下潔觴置酒旨且柔小
姑倚絕岸彭郎渺孤洲脈脈關情隔烟水不如天孫絕
漢從牽牛明發風止江鏡淨楚天無際來棹謳回首繫
舟處惟有參差煙樹飛鳧鷗世事翻覆那有定人生憂

樂誰為謀慨彼東逝川白日不得須臾留濯滄浪委浮
休買田結屋山之幽擷芳釣鮮亦足樂安用高門列鼎
冠蓋誇鳴騶

岳陽樓

張經

巴陵形勝甲天下郡治西南有樓曰岳陽盡得
巴陵之勝至元丙戌余以監察御史按臨長沙
道出巴陵凡一往返不暇一登甲午夏備員湖
北憲司分司于辰始得以酬平昔之志噫湖山

如此造物者何其靳耶因留數語以志歲月云
洞庭一水七百里烟朝月夕皆經過豈知斜陽萬里更
有一佳處君山十二盤青螺乾坤有此樓萬古高嵯峩
憶昨長江咫尺限南北風霜畫本一日千摩挲今朝快
一登恍若驅沈疴生平所羨鑑湖請乃今更覺君恩多
湘靈也自知我至時令白鳥來婆娑鐵笛紫荆曲春草
黃陵歌江山一醉謾不省悲風落日生白波愛山愛水
亦非癖奈此日月如飛梭彭蠡銀山堆碧海青銅磨

缺

昌雲間嘆黃鶴采石天外愁青蛾詩家割據幾

缺

氣發泄天不訶扁舟歸來月一蓑仙槎已候三山阿吾
欲乘興觀銀河

雲林歌為貢供奉作

范村

朝望宣城夕企雲林掃花釣月清我閒心城東之山倚
天碧手捫南斗近咫尺幽人築堂面山坐絕似謝公故
時宅謝公今何在蒼苔鬢行跡調笑誦新詩流水照白
石看水作明鏡年光靜來往夜深敬亭雨坐見南湖長

清風被長阪鳥度菱葭響雲之林兮不可攀中有青猿
白鶴相盤桓林之雲兮不可縛時來宿我青檐端昂藏
老仙人把劍卧山側憶在中華時相逢鬢未白問之不
笑亦不言阿家中子瀛洲客却起遺我寶字書依稀攝
精鍊魂魄相期後天無極年共爾守之合自然專氣還
得同飛仙未登雲林堂試作雲林歌嗟我久客意衰邁
雲林雲林奈爾何

望瀛海一首送危太樸之四明兼簡廉訪鄧使君

翰林袁侍講

危君英妙年獨往志千載天馬出名駒空行見風采
昨日銜書到空谷甚欲留之不能待九月開帆指四明
要逐高秋望瀛海海上接天漫漫世人不知此別難當
君夷猶碧嶼日是我對月水夕猿狖啼青巒江樹葉飛
天雨霜江上吳歛思斷腸窈窕徐家兒與女都望蓬萊
如故鄉君行却向三山望雲霧軒窗六鰲上東方雖樂
不可以久留歸獻仙公白雲唱西過錢塘遇順風為拜

湖南持斧翁會稽學士卧雲島朱絃流水鳴孤桐道我
寄語莫匆匆送君有情亦如海海水有盡別意終無窮

贈別清夫還吳

新雨不作泥鈎翰樹上啼征夫懷遠路家在太湖西別
家今幾度楊柳江邊樹念鄉車輪下漸是中年路萬事
中年尚可期人生且莫長別離長別離向何方九江落
花清浦香王睢班班鳧乳黃南望不見三高堂奈此遊
子思故鄉我家諸公濟時早功成身退合天道當時未

必知者賢挽不回之卧烟鳥後來閱盡虧成事始識從
之去時好我不能赤手縛虹蜺又不能委身同草木生
逢堯舜世肯受泥塗辱昨者誤奮龍門雷蠃蚌嘲之自
云足憂來舉觴酌白日惟有皇天照空谷張公子吳江
生我有千載意不羨身後名為君寫作贈行曲曲中鏗
戛難為明君行不聽我意不平明日買船擢秋聲亦欲
東下窺蓬瀛飄然如去白玉京須知禹穴來相迎相迎
未見須相待客行雖遲心不改

送戴和甫歸越州

虞集

戴先生日飲五斗醉不得再飲一石不肯眠昨從桃源
來兩袖攜風煙長安市上小兒女拍手攔道呼神仙馬
如遊龍花如雨蹴踏春秋作朝暮東方不作窻間戲上
帝還令海邊去海邊玉虹夜不收貝宮珠闕皆蛟虬芝
田玉樹久相待天上老仙那肯留戴先生鑑湖之水三
千丈不可以鑑可以釀明朝亦脫錦袍去與爾酣歌釣

船上

送海東之下第

海東之兄弟二人如鳳凰曾臆羽翮皆文章九年三入
天門翔伯沖天季驚人一日四海皆知名東之之文五
色雲見者眩晃生眇昏缺若耳不聞二人

得之喜未足云東之不愠乃可尊東書

缺

歸見親君

子之樂樂最真君不見匡廬之山嵩萃而嵯峩左界豫
章諸川匯為蠡鄱其陰浩浩千源導岷經潛沱山氣束
鬱不得去上衝為紫蓋直與天相摩為雲覆八極為雨

漲九河海東之子能觀山以成德其進蓋未易量也偶
爾小屈奈爾何

送素庵劉總管歸

黃清老

當年繡斧出九天
倏如白雲下長川
千峯收雨作秋色
至今梧竹吟寒泉
熙臺重來又三載
干將出匣光不改
冰漿盡貯明月秋
風露冥冥接滄海
海空迢迢行玉麟
霜影蕩漾龍蛇驚
石田歸來紫芝好
策馬更入南山青
漁陽歌兩歧何如
陽春生物物不知
魯人頌泮水何如

絃歌一千里，昆也虎渡河。寬也蒲作鞭，何如樵溪九曲。
落葉靜平鋪，綠水栽紅蓮。紫微殿前列，藩輔華蓋蒼蒼。
五星聚夔龍，蹶躡天一方。蟋蟀吟秋桂，枝暮蓬萊楓。葉
昨夜秋瑤樓，夢覺題金甌。銀河橫空白鸞去，安得追逐
釣天遊。

留別金門知己

李洞

我本山人素志丘壑，獲歸名山為願畢矣。爰以
四月十一日離京師，是夜抵潞陽，慨然賦詩遙

慰匡廬隱者并似金門諸公為一喙云

野馬脫羈鞅，倏疑天地寬。
臨風一長鳴，風吹散入青冥間。
頗如魯仲連，蹈海不復還。
又如安期生，長留一鳥令人看。
江南浩蕩忽如海，落日照耀浮雲關。
既不能低眉伏氣摧心顏，詭遇特達驚冥頑。
又不能抱書挾策千萬乘，調笑日月相迴盤。
匡廬迢迢接仙山，仙翁泛若秋雲間。
長松之陰引孤鶴，望我不見空長嘆。
采鉛天地津，飲綠桃花灣。
蒼梧倒影三湘寒，赤城霞氣生微瀾。
鯨鯢翻

空海波赤曉色欲上扶桑難人間之樂兮誠不足恃何
如歸卧棲岩巒棲岩巒卧岩穴夜半天風吹酒醒猶有
西溪萬年月

漢陽郎官湖

仙翁薄暮醉酒歸杖藜迷却高陽池清風吹花綠陰倒
我笑謂是秋雲移還乘貫月槎夜過郎官湖崢嶸星斗
入江漢蕩漾槎影如鯨魚九華之真人邀我倒玉壺麒
麟擘脯供行厨依稀仙樂在空際碧山四映寒蟾孤舉

酒酌寒蟾明月下飲姮娥俱霓裳拂雲錦萬荷露瀉瓊
瑤卮麾幢晝靄羅烟空乃有三皇所授之玉童風前飄
飄曳廣帶對立十二秋芙蓉清香九曲銀河通真人綠
髮披春風錦袍玉雪照天地口說姓氏安南公是公多
逸氣畧與古昔賢豪同時能掃月色延我石室烟蘿中
又言昔同張謂所遊地長笑一覆丹霞鍾風吹仙樂度
溪去我亦醉卧香爐峯

金山

潘景良

嵌岩穹窿屹立于江中崩湍下瞰不見底巨石崛起高
摩空混沌破來到今幾萬歲雄奇秀麗胡為乎此山兮
獨鍾長江西來一萬里當空削出金芙蓉上有金仙居
下有馮夷宮寶坊櫛比列霄漢塔影倒置驚魚龍有時
洪鐘咽煙響潮音屬和驅羣鷲鳥飛竟力不得到我嘗
擘舟一抵其雲峯攝衣步樓閣矯首觀無窮齊州九點
落眼底岷峩西望蒼溟濛忽聞長風破巨浪芥蒂一洗
平生曾山僧喜殊常握手何從容盃擎陸羽水茶泛玉

川風鶴菴散仙恒齋老翁把臂大笑聲融融天風吹袂
欲輕舉白雲縹緲知何從不知海外之三山羣仙之樂
與此將異而或同迄今別去五六載我舟又復來掀蓬
山靈偃蹇我踞傲塵懷汨沒不得追前蹤風帆一笑金
山過山頭落日飛冥鴻

太山高一首上王尚書

納新

太山高不知其幾千丈兮但見衡恒嵩華何其低膚寸
之雲雨天下東西南北三十七萬八千里內無枯哇吾

儕小人重報本春至三月下澣之八日幼壯老稚相扶
攜五步一稽首十步一頓顙蠟光檀氣壓衢路帝德浩
蕩無端倪帝曰嗟下民何以厚汝裋我有香案吏置之
黃金閨前期一日遠賚汝下與有宋十一葉天子蘇遺
黎宵中七百里雲夢筆端一萬丈虹霓臂間六鈞弓指
下十萬輦囊中書萬卷坐上賦十題朝聞擢英上蟾蜍
暮見賜食烹駉馱蒼苔紅藥省中宿花底柳邊歸路迷
上坡直作威鳳鳴騎馬不敢寒鷄栖綠蓑青笠忽夢江

海去便欲畢命依鳧鷖一朝喚起作邊帥黃河以北兒
女皆驚啼載筆九天上判花雙禁西夕闈拜青瑣金殿
執牙篋銓衡百里缺文印九州提此皆東坡六一間關
所僅得老馬歷遍無留蹄不羨百官班迎入東閣不羨
十里列炬行沙堤千羨萬羨越中千崑與萬壑雲門寺
外若耶溪丈夫東來不用高牙千騎殺風景只在古錦
詩囊消一奚蓬萊閣上三大字意氣欲與羲獻父子相
攀躋元才子龐將軍二人名字不相齊一公文字照今

古一公武烈傳髦覲皆不如王尚書詩隨賈客過南海
箭壓飛將驚幽蹊但令千歲眉壽無與害世間富貴
塵泥

丹山高壽陳本堂

戴時芳

太學博士本翁先生降神華旦六月望前二日
也雪溪亭長戴某賦丹山高

丹山高哉維石巖巖兮卓然竝立上摩杳靄之蒼空赤
水西來走其下是為四明洞天兮石窻面而光與日月

星辰通上有蟠桃三千歲下有玉樓十二重瓊芝瑤草
不知其名兮蒼虬玄鹿羅洞府中有仙翁擾白龍方瞳
耿耿射日月筇九節兮冠芙蓉當年曾朝天帝所六月
火雲導祝融帝憐下土焦槁曰汝往哉少試霖雨功於
是瀉驄瓢於帝鄉神臯之地兮麾叱列缺鞭豐隆既而
桑田變滄海往往才大者亦難為用兮神功始收斂於
雲蹤但見丹崖仙筆照今古夜半碧鷄啼動扶桑紅我
翁掀髯奮長笑起踏斗杓呼天風王母驂鸞下瑤闕廣

成跨鶴來崆峒少君歸從赤城北長君來自金華東金
華赤城總是神仙客引領翩翩羣從壽我翁我翁今年
開九裘精神矍鑠氣如虹擁書百城縱麾指又何羨乎
後車之載非羆熊回頭舊京二十載春夢阿婆一笑中
見謂全身保明哲又何遜乎子房之遊從赤松富貴威
武不可以苟屈兮自非仙風道骨有真趣宜許我輩雞
犬長相從比之丹山高節世所少嗟我欲說安得廬山
高哉巨筆如歐公

黃鶴樓

陳孚

喋喋乎黃鶴之樓兮突起乎天之東南吾不知其幾百
尺兮踞石磴而仰望眩金碧之眈眈手捫星漢如可近
但見天颺吹髮寒髮鬢鬢瞿塘三峽之波濤洶湧訇擊而
下兮雷聲怒撼千江潭忽繞城以北匯淨若萬頃之青
藍楚山數點鸞鷲蛟躍兮碧影倒浸乎煙嵐殘霞似落
未落兮蒲獵獵以風偃柳依依以露含武昌亭臺一十
萬瓦光參差浮榭楠下視十二之衢兮袷服士女東西

行者藐蠕

缺

之吳蠶黃鶴之仙人霓冠青瑤簪御絳旌

于列缺倒景兮偶見我以大笑欲駐我征驂攀東溟之
博羅曜折西極之優鉢曇飲我以葡萄鴨頭之綠兮侑
以洞庭之蒼柑洞庭帝子鼓軒轅之瑟兮舞干戚而撞
宮函白也挾赤鯨以旁睨崔顥惓縮而不敢以談浩浩
乎萬丈之氣兮長虹橫空天矯而方酣下蟠黃之輿上
斡玄之堪安得挽招搖以酌元氣兮妙太極而函三慨
彼在昔如焚如悞陶司馬之狂悖庾大令之貪恠鸚鵡

之洲何罪而戮赤壁之磯何功而戮吾豈若二三子斷
崑崙之璞兮輕蹈夫太阿之鐔飛來兮黃鶴跨汝從兮
彭聃

書李伯時九歌圖後

吳澂

李家畫手入神品楚賢流風清凜凜誰遣巫咸叫帝閭
為招江上歸來魂音紛紛音紛紛桂高辰遠聰不聞扶
桑初瞰海橫雲一妃淚洒重華墳司命播物泥在鈞洪
纖厚薄無齊勻公無渡公無渡衝風起螭鼉怒夜猿啾

啾天欲雨天欲雨迷歸路歲晏山中採蘭杜靈脩顧顧
復去莫怨瑤臺神女妬坎坎鼓進芳醕恥作蠻巫小腰
舞千年往事今如新摩挲舊畫空愴神騰身輕舉一回
首楚天萬里江湖春

韓節婦

彭家

巴陵郡西江水渾赤沙黃壤東南奔邇來湜湜已百載
中有婉孌之忠魂當時郡有賈氏婦志節凜凜摩乾坤
家亡國破身繫義不辱乃是韓魏國忠獻五世之曾孫

臨平湖開石封發五陵氣盡天房昏鐵馬三百萬北來
正噉噉連城破竹勢迎刃牽羊繫頸投冠解綬乞伏竄
匿俱紛紛不意弱草中見此松柏根讀書不如曹大家
事夫却似桓少君君臣大義本與夫婦一慷慨萬古保
貞操視死生朝夕不啻富貴如浮雲恨不生為男橫戈
赴三軍棲棲臨絕音耿耿昭人文練裳縱橫四百字上
陳祖宗創業有至道下斥奸邪誤國偷生存吾辭既畢
分已盡精衛何苦猶銜寃想當捐珮入不測幽光上浮

白日馭陰魄下塞珠宮門湘靈鼓瑟宓妃泣馮夷長嘯
羣龍翻至今誦其詩感其事令人浩氣填膺那可捫或
者疑之不能成人善為其見夢於人不若效靈史氏為
可敦嗚呼世無歐陽公斷臂之婦終無聞可以愧賣降
表貞節薄俗誰能譏兔園我願然犀取靈封以厦屋旌
以石表雙高躡奏之大庭布天下激厲臣子皆忠淳可
以植三綱正人倫為余有不信請視曹娥墳

餘姚海堤為判官葉敬常賦

楊維禎

天吳蜚精衛啼娥江之北蛟門之西大禹東來朝會稽
九河一疏錫元圭寥寥三千載桑田變滄海洛水日橫
流我思訴真宰相門子葉大夫莅政三月初海如瓠子
決滌瀆趨江濤黑浪相吞屠元光白馬有祭璧羽山黃
熊無玉書蛟眼射赤日蜚民不寧居葉大夫海砥柱驅
兔鞭運神斧五丁一力萬夫一語新甫取柏崑山取石
金錐築土首鎖陽侯之咽脚踏支祁之股玉繩永奠三
萬六千尺陳公堤白公渠無足數君不見石人夜語魯

已仙河伯血面上訴天葉大夫迴狂瀾障百川海不波
石不穿河清海晏三千年

賦海涉

海風吹沙潮欲來青蝦亂跳凝紫苔初疑長劍斫出老
蛟血又疑霹靂擊破妖龍胎蟹湯微泣瑪瑙髓蜀錦亂
把并刀裁紅冰嚼碎齒不冷丹霞入腹鳴饑雷坐令海
水化作葡萄醅我當大嚼一飲三百盃

元詩體要卷三

欽定四庫全書

元詩體要卷四

明 宋公傳 編

雜古體

此體非騷非樂府其辭激切含規諷意有感人者亦
古歌辭之類今準郭茂倩樂府集雜歌辭例編置長
短句之後以別古今體裁之變庶幾無滄海遺珠之
歎云

楚人弓

陸宅之

楚人弓懸兩石五十萬矢陷強敵絳人弓箭二隻長歌
入關成偉績多箭不如少箭力制敵若在弓矢間鳴條
牧野高於山

國馬足

國馬足吉行五十轡如沃天馬足一日千里更神速國
馬天閑飽芻粟太行鹽車天馬哭

母提刀

僕固懷恩欲叛其
母止之 萬權

母提刀泣且教臣當死忠子當死孝天王待汝恩不薄

食邑大寧頒紫誥兩虎爭百獸咲我欲為國除殘暴剗
爾心謝三軍斷爾頭告七廟嗚呼賊子何煩老吾老

瓶有粟

李孝光

友人張子約名其齋顏樂子見而訊之則曰吾
姑以自名吾烏知所謂顏子淵彼固不自知而
孔子知之吾又烏知吾之樂凡吾所為自名亦
以待夫吾知者爾予於是為之作瓶有粟

瓶有粟兮孰云吾瘦居有宮兮孰笑吾陋御冬有褐兮

又馬用夫文繡人予哀兮予不知入事父與母兮出從
仲尼謂蠨蛸兮無胃我戶吾歎歌兮其下

沂有梁

沂有梁兮維鯉維魴沂之兩厓兮有棗樹桑居沂之人
兮寬裕而善良古之人古之人兮翱翔余其歸老兮沂
之南東

擇木

孔子去衛歎曰鳥能擇木木豈能擇鳥乎予將

去楚而適吳越竊有感於斯言故作擇木

提提兮飛鳥翔而集兮于木場有委粟兮而予之不欲
樊則有棘兮非予之樂鷲則不仁曾莫予毒又集于陵
母墜于矰豈不知兮有命嗟今之人兮不仁

東里

葛之漫漫母敗我垣河水之清母齧我稻田予甚勞苦
彼黔不知予將遂歸其畚其菑東里之老聞予言而嘻
予曰歸哉

有樊

有樊有樊樹予以蓀胡不蕭艾蕭艾寔繁彼繁胡治刈
而為芻嗟人有邑曾不是圖匪予蓀之病予聞有命

歸來

有悻孺子衣之狐裘匪予之病予以為仇既撰予杖升
望于丘江不可涉夕具予舟

桐江

朝取鱸與鮓莫取魴與鱖賦民無令困革盡毛安處我

欲言之大將軍大將軍不見省奈何減民田租將軍出
乘大馬入乘高車

滌水

滌水兮滔滔其坎兮有蛟謂子兮無濟遂濟兮無匏使
予兮心恚其幽兮有虎啄害人兮不吐謂子兮無斧又
無兮強弩曾是兮弗顧獨奈何兮而逢其怒

隴頭水 周到坡

隴頭水鳴咽鳴咽行人聽斷腸聲隴頭水鳴咽鳴咽行人淚

眼中血山月薄塞雲低行人到此心傷悲
世間萬水東流去隴水分流獨向西

江橋樹

阮魯瞻

江橋樹荏苒年華暮迎得行人來送得行人去
落葉成秋風行人在何處

次韻

鄧或之

江橋樹日日斜陽暮春風吹落花半隨流水去
花落有盡時水流無盡處

悲寒風

張翥

夜漫漫風凜凜嚴霜下寒更甚狐鳴鬼嘯有今夕倉卒
劍戟生高枕神光墮地摧白虹鳴呢英雄淚空飲

一馬圖

貢師泰

鐵喙駟連錢驄何年墮影江水中蒲梢西來八尺龍天
閑十二為爾空五花雲錦吹東風

言體

託物興喻辭多引用而復斷以己意若揚子法言莊

周寓言宋玉大言皆言也詩家亦有此題今因題得
詩就詩命體其篇什多有可錄者故立言體以備觀
者之采擇云

寓言

徐甫

苦樂有冥定結髮與君婚中道棄我去白馬駕華軒燕
趙足佳麗吳楚多嬋媛妾自守空房蠨蛸網妾門妾身
當自愛敢謂君少思

雜言

林清源

大樸本淳默結繩已多端書契起百偽千載不復旋大
道日已降支離競各言安得萬喙寂俗厚如古先仍當
廢簡牒置我六籍前

禮樂設空器詩書無全經仲尼既已矣沮溺不耦耕誰
能笑庖犧今亦無負苓我欲觀馬圖黃河清未清

東家陶苦窳適市日十千西家琢瑚璉待賈二十年材
輕信易售器重良自憐世事每如此古今無不然

吾嘗觀四時亦復悲草木秋風落人間百卉不敢綠豈

無岩谷英粲粲若松菊但得根本堅自然耐幽獨

春日雜言

揭傒斯

日月朝朝新何物能獨久常恐天與地變化忽已朽東
風闖然來茫茫浩無首起視桃李樹睽豔一非舊如何

揚子雲泯默空自守

朝出城西門孤墳何穹窿雄狐竄其西脩蛇出其東云
昔有狂士七尺材且雄平生無所賴屠狗涉春冬一朝
際風塵身貴位益崇死生好惡間咄嗟生秋風氣驕日

憑陵家國兩蒿蓬子孫分散盡空有牛羊蹤

畧歷揚柳枝蒙茸春草齊天天誰家婦采桑路歧零
露霑其裳蛛絲罥其衣樹高身苦弱蠶饑行復遲辛苦
事姑嫜宿昔減容輝見者皆嘆息此心知獨誰良人日
暮至醉問爾何為

啁啁田間雀啄啄常不給春水日已深網羅復相及既
無養生具日夕湯火急多謝雲間禽無為自羈紲

祝融九千丈瀟湘地底流洶湧洞庭野崩騰江漢秋上

有飛仙人身披紫雲裘昔者常相遇渺若乘丹丘同歌
黃鶴渚共醉岳陽樓思之忽不見獨立悵悠悠

我有琅玕草欲贈江東客出門道路長卷袂空歎息靈
苗世所尚良士余所惜神仙無千年耿耿誰復識

五歲能讀書十歲能賦詩十五事遠遊三十無所為既
乖俯仰責復為隣里欺生計日已踈世態多瑕疵煌煌
金張門徒隸皆光輝日晏賓客集軒車如風馳一笑擲
千金片言委黃泥齊生獨抱瑟來徃空逶迤

齋居雜言

何榮祖

名教無窮樂真知在暮年中庸萬事畢太極一心全世
事頻觀易人情靜看天興來時有句率爾亦飄然

續絃言

楊維禎

麟角煮為膠續絃絃在弓丁寧弦上箭莫射孤飛鴻

買妾言

買妾千黃金許身不許心使君聞有婦夜夜白頭吟

詞體

感觸事物託於文章謂之辭若燕射辭士冠禮祝辭皆古辭也秋風辭白紵辭皆樂府辭也今名雖同而詞則異但因其題而備其體云爾

去婦詞

揭傒斯

江東有一士子留都下三年適娶一貴人女為妻久乃知其已有妻子矣一夕逃去因托去婦為之詩非徒欲傳其事抑以示風戒云爾

輕合鮮義終苟容希禮遇遠結萬里昏多為才名誤始

與君結好不知君有婦有女嫁他人俱懷託遲暮青青
墻下草生死墻下路娟娟道傍花零落無處所女子失
其身何以保貞素既乖百年意百年誰能度對鏡空悲
惜中心良難訴浮萍難為託一本無兩附棄舊屬新歡
新歡漸成故寧當中路折莫被他人去寧老阿母傍不
受他人妬騰身出房闥兩絕無復顧所願嫁他人甘心
西山樹

去婦詞

趙半間

里有孀婦子不檢而無室既疾病乃亟為娶且
命之曰為汝娶為宗祀計也未幾死而子竟違
母言尋出其婦婦以衰麻在身義不得去被迫
逐不可留因為詩以寫懷

落葉不返柯去婦無歸年斂袂出故幃獨影心悽然君
心紙鳶飛萬里難拘牽妾如鬢邊花未衰先棄捐憶昔
初嫁君姑病在床前歲月能幾何衰麻奉姑筵妾今辭
門去撫棺淚如泉九原會有知當為去婦憐

毛女詞

揚維楨

海腥風吹腐龍華陰毛竹藏雙魚

叶

濃宮中雨露不可食

啖松啖栢留春容乘彤雲挾紅霧十二峯頭度朝暮衣
沐雨鬢擲風榭葉楚楚山華紅秦宮舊鏡掩明月咸陽
目送雙飛鴻

彭郎詞

番之湖兮雲水杳萬頃晴波淨如掃相逢漁子問二姑
大姑不如小姑好小姑昨夜巧粧束新月半痕玉梳小

彭郎欲娶無良媒飛向廬山尋五老五老頽然不肯起
彭郎怒踢香爐倒彭郎彭郎歸去來陶令門前烟樹曉
龍王嫁女詞

海中有大小龍拔水而飛雷車挾之以行者海
老謂之龍王嫁女故賦此詞補龍姑樂府

小龍啼春大龍惱海田雨落成砂砲天吳擘山作海道
鱗車魚馬紛來到鳴鞘聲隱珮鏘瓊瓊姬玉女桃花粧
貝宮夫人笄十八新嫁南山白石郎西來態盈慶春壻

結子蟠桃不論歲秋深寄字湖龍姑蘭香廟下一雙魚

古促促詞

張翥

促促何促促丈夫生兒美如玉長成遊蕩不思歸令我
隻身守空屋不願汝學班定遠不願汝學馬相如定遠
生不入玉關相如死不還成都但如塞翁父子長相保
得馬失馬何足道又如龐公携家隱鹿門遺安遺危俱
不論貴而衣貂不如貧而緼臬離而食肉不如聚而飲
水身雖促促心得寬為汝白頭屋中死

征夫詞

留祁

頑雲漠漠秋天黑，冷雨瀟瀟和雪滴。途中騎士衣裳單，
半夜銜枚赴靈壁。中州近歲雨雪多，只因戎馬窺黃河。
將軍錦帳衣千襲，馬上揮鞭傳令急。但令飽煖度朝夕，
一死沙場吾不惜。九重日望凱歌歸，安知中路行逶迤。
願將舞女纏頭錦，添作征人身上衣。

征婦詞

青燈熒熒照空壁，綺窓月上莎雞泣。良人塞上遠從軍，

獨妾深閨長太息憶初癡小嫁君時謂君不晚擁旌麾
如何十載尚興隸東屯西戍長奔馳秋風戎馬臨關路
千里持矛關上去公家事急將令嚴兒女私情那得顧
恨妾不為金鞞鞞在君腰下隨風埃恨妾不為龍泉劍
在君手內飛光燄慕君不得逐君行翠袖斑斕空血染
君不見重瞳鳳駕游九疑蒼梧望斷猶不歸況今沙場征
戰地千人同去幾人回君回不回俱未見妾心如石那可轉

秋胡妻詞

王餘慶

桑顛日射黃金枝桑間美人白玉肌採桑盈筐郎未歸
東風吹淚濕羅衣郎未歸在遠道妾尚少兮親已老郎
心如蘖妾如丹富貴應須到家早採桑待露晞養蠶圖
得絲生男且富貴甘旨當及時千金却為一笑資倚閭
日暮無窮悲願嫁反哺烏不忍見秋胡

文瑞圖

揭奕斯

常德之龍陽居多蜀士祠事梓潼君甚嚴祠前
有池曰景星凡蓮花葉並蒂則居人登第好事

者寫以為圖邀余賦此

蓮花復蓮葉並蒂更連莖並葉已不見三花兩花更有
情如何與人作嘉瑞偏向龍陽水底生龍陽家事梓潼
君花花葉葉梓潼神好在龍陽士女但讀書更

缺

花為葉汝莫論

和東坡四時詞

劉說

燕子輕寒生院落佳人自卷猩紅幕樓頭風細墮楊花
簾下日長添繡萼纈紋酒暈透瓊肌雙陸初贏笑問誰

金少曰及
卷四
閒館同心當戶立不知花影滿春衣

幕波微皺迴廊永酒闌手枕珊瑚冷槐影橫堦午簟涼
榴花滿地風簾靜梅酸未試意先顰倦拂琵琶撥未勻
紈扇半閒冰盃凍翠禽兩兩下窺人

瓶浸雙頭蓮顆綠畫闌閑却青奴竹微涼半下水晶簾
坐看踈螢度高屋夜靜樓風時動扃隔牆一葉落虛庭
血色鴛羅裁未就月明處處起砧聲

燭暗睡消聞畫角玉盃脂水紅冰薄深戶無風繡幄垂

小餅一片梅花落
輓轡隔屋聲
咿啞雲母香
貌暈宿霞
報道卷簾寒
霧重午粧纔試
翠鈿花

宮詞四景

薩都拉

玉溝漲暖綠潺潺
風細時聞響珮環
芳草宮門金鎖合
柳花簾幕玉鈎閑
夢回繡枕聞黃鳥
困倚雕闌看白鷗
落盡海棠天不管
脩眉凝恨鎖春山

日長縫就縷金衣
高柳風清拂翠絲
閒倚小樓題畫扇
但聞別院笑彈碁
主家思愛有時盡
賤妾心情無限思

又擬晚涼新浴罷琵琶自撥斷腸詞

宮溝水淺不通潮涼露瑤階濕翠翹天遠不聞青玉佩
月明偷弄紫鸞簫正宮夜短羊車近別院秋深鶴駕遙
却把閒情望牛女銀河烏鵲早成橋

悄悄深宮不見人倚門唯見石麒麟芙蓉帳冷愁長夜
翡翠簾垂隔小春天遠難通青鳥信瓦寒欲動白龍鱗
夜深怕有羊車到自起籠燈照雪痕

宮詞

馬祖常

華清水殿繡夫容金鴨香銷寶帳重竹葉羊車來別院
何人空聽景陽鐘

銀床井冷露溥溥半臂薰衣釧辟寒不恨長門冬夜永
小奴休報襪羅單

長門月轉漏聲催自熨寒衣減帶圍休怕官家嫌體弱
細腰曾是楚王妃

合宮舟泛濯龍池端午爭懸百綵絲新賜承恩脂粉磴
上陽不敢妬蛾眉

繭館綠絲濕翠翹夫人織指織龍綃羅襦雙珮清晨響
只恐君王有晏朝

八姨粉翠錫千緡脂盃新粧百寶勻白髮上陽宮女老
補衣重拆繡麒麟

卯酒微微解宿醒催花羯鼓報新聲君王好錫承恩宴
辛苦邊頭百將營

露蘭研粉壽陽粧奩內新燒百刻香圓舌教成鸚鵡語
偷將玉笛送寧王

銀河七夕度雙星
桐樹逢秋葉未零
萬歲君王當寧立
妾身不顧命如萍

花氣蒸霞淑景明
望仙樓上看彈鶯
李暮吹笛宮墻外
學得梨園第幾聲

又 鄧元宏

淡月輕寒透碧紗
宮屏殘夢曉啼鴉
春風不管愁深淺
日日開門掃落花

又 楊維禱

宮詞詩家之大香奩也不許村學究語為本朝
宮詞者多矣或拘於用典故又或拘於用國語
皆損詩體天歷間余同年薩天錫善為宮詞且
索余和什通和二十章今存十二章

雞人報曉五門開鹵簿千官泊虎臺天上駕鸞先有信
九重鸞駕上都迴

開國遺音樂府傳白翎飛上十三弦大金優諫闕卿在
伊尹扶湯進劇編

海內車書混一時
奎章御筆寫烏絲
朝來中貴傳宣急
南國宮娥拱鳳池

薰風殿閣日初長
南貢新來荔子香
西邸阿環方病齒
金籠分賜雪衣娘

宮錦裁衣錫聖恩
朝來金榜揭天門
老娥原是南州女
私喜南人擢殿元

出幸和林幄殿寬
鈎麗女侍媵好官君
王自賦昭君曲
勅賜琵琶馬上彈

后土瓊仙屬內家揚州從此絕名花
君王題品容誰並
萼綠宮中萼綠華

十二瓊樓浸月華
桐花移影上窗紗
簾前不插鹽枝竹
臥聽金羊引小車

金屋秋深露氣涼
宮監久不到西廂
丁寧莫竊寧哥笛
鸚鵡無情說短長

露氣夜生鸚鵡樓
井梧葉葉已知秋
君王只禁宮中蠶
不禁流紅出御溝

十三宮女善詞章
長立君王玉几傍
阿婉有才還有累
宮中鸚鵡啄條桑

蛾眉曠處不勝秋
長帶芙蓉小苑愁
肯為君王通一笑
羽書烽火誤諸侯

春宮詞

薩都拉

深宮盡日垂簾箔
別殿何人奏玉箏
白面內人無一事
隔花時聽打毬聲

秋宮詞

清夜宮車出建章紫衣小隊兩三行石闌干外銀燈過
照見芙蓉葉上霜

春宮詞

顧濟

蘭徑香銷玉輦蹤梨花不肯負春風綠窻深鎖無人見
自碾朱砂養守宮

古長信秋詞

甘立

缺月流光入綺疏金壺傳箭夢回初秦臺彩鳳無消息
桂影空閒十二除

輦路青苔雨後深
銅魚雙鑰晝沉沉
詞臣還有相如在
不得當時買賦金

錦瑟詞

趙復

歌珠檀板楚王宮
伴醉花間拾落紅
鐵馬北來人事改
不知隨水定隨風

西湖竹枝詞

楊維禎

竹枝本夜郎之音
依聲製辭實起劉朗州辭
若鄙陋而發情止義
則有風人騷子之遺意
然則

製竹枝者不猶愈與今樂府製湖中曲者多矣
而未有補竹枝之缺故余補十章更率能言之
士繼之

蘇小門前花滿株蘇公堤下水平湖
南官北使須到此
江南西湖天下無

家住西湖新婦磯
勸郎休唱縷金衣
琵琶本是韓憑木
彈作鴛鴦一處飛

湖口行雲湖日陰
湖中斷橋湖水深
行雲無心似郎意

斷橋有柱是奴心

勸郎休上南高峯勸郎休上北高峯南高峯雲北高雨
雲雨相隨惱殺儂

石新婦下水連空飛來峯前山萬重妾死甘為石新婦
蕭郎或似飛來峯

片言許郎金石剛阿奴不是野鴛鴦為郎歌舞為郎死
不惜真珠成斗量

望郎一朝又一朝信郎信似錢塘潮錢塘潮信有時失

臂上守宮無日消

水仙廟下是儂樓樓前有儂蓮葉舟行人苦道橫波急
不載行人西渡頭

採蓮能歌歌莫愁因學吹笛唱梁州不識黃雲隴水怨
吹作大堤揚柳秋

奴家即在西塍頭不比春風蘇小愁人道西湖女淫苦
安得有此青陵丘

又
鄭韶

閑鎖六橋春水深
鴛鴦鸕鶿蕩人心
吳兒生長自吳語
却向船頭學楚吟

壚頭三月春酒香
門前楊柳萬條長
憑郎醉後休折斷
留待重來繫馬韉

楓篁嶺頭西日暉
青龍港口新月微
放船過去還蚤在
待奴一道夜歌歸

湖上荷花嬌欲語
湖中女兒木蘭舟
荷花折得渾自好
只恐荷盤不耐秋

蘇堤寺堤一徑同春花秋月長相逢白面少年不相識
笑擲金錢喚阿儂

又陶孟愷

江邊雲寒楓葉秋望郎郎上西江頭舟行千里是郎去
水流千里是奴愁

湖邊採蓮逢小姑阿郎捕魚饑渴無勸郎高歌白苧舞
為郎沽酒青玉壺

又康崙

南高峯頭雲未開
北高峯頭雨頻催
為雲為雨幾時了
醉裏相期夢裏來

合歡釵頭雙荔支
同心結得能幾時
蓮莖有刺郎解折
蓮子有心奴自知

拍湖春水段家橋
紫額湘簾碧玉簫
橋邊楊柳為誰苦
牽惹風光千萬條

又 張世昌

秦皇石頭三丈高
云是秦皇繫船標
阿奴心似繫船石

浪打風吹石不搖

奴住西湖日日愁郎家只在淞江頭阿誰移得孤山去
長使江湖一處流

六橋橋上望西湖望見吳王舊姑蘇西施不為吳王死
又載扁舟歸越都

昨夜雨晴溪水深雞頭菱角滿湖陰勸郎試剝新蓮子
萋萋中間有苦心

又 信道原

湖東日脚欲沒山湖西月出牙梳彎南北兩峯船裏看
恰似阿奴雙髻鬟

東邊高樓紅紫開西邊青山翠成堆吳兒蕩槳浪花裏
相賽唱歌船去來

又 字文子貞

赤欄橋低宮柳斜粉牆短短阿誰家女郎恰抱琵琶出
早有小船來賣花

奴唱吳歌郎扣舷明朝郎去有誰憐恨殺吳山遮望眼

不見江頭郎去船

斷霞洒洒魚尾紅清唱一聲湖山東阿奴只在繡簾裏
隔着荷花無路通

湖裏芙蓉日日多蘇小門前無客過今來古往只如此
休說當年賈八哥

湖上交秋風露涼湖中蓮藕試新嘗蓮心恰似妾心苦
郎意爭似藕絲長

菱花菱葉間水藻采蓮入港與郎逢勸郎挾彈休打鴨

鴛鴦飛起杳無蹤

孤山山上野梅開
折花傍水傾金杯
揔道梅花天下白
祇似渠奴傅粉腮

又 吳禮

不愛郎君紫綺裘
不愛郎君珊瑚鈎
永求同生願同死
化作蓮花長並頭

又 貢師泰

芙蓉葉底雙鴛鴦
飛來飛去在橫塘
人生多少不如意

水遠山長難見郎

葛嶺西邊師相宅潭潭府第欲連雲別買樓船過湖去
可曾看見岳王墳

又 丁復

上塘楊柳下塘陰阿郎愛人不愛金塘水西來東入海
水深不似阿儂深

柳葉如眉枝似腰贈郎輒挽最長條條長即與儂心遠
不是為儂春態嬌

錢塘潮來兩岸平
錢塘潮落江月明
錢塘女子新樓閣
夜半吹簫鸞鳳鳴

郎愛捕魚儂織蓑
勸郎不必要登科
一家賣魚得食少
一官懸魚憂患多

竹枝詞 陶孟愷

白鹽山下水流急
白帝城邊楓葉稀
唱斷竹枝人不見
山頭月落鷓鴣飛

小游仙詞 張翥

清華公子並騎龍直過蓬萊第一峯親見海中城闕好
半栽玉樹半芙蓉

五色烟中玉女窻鳳歌鸞舞一雙雙除是飛瓊方教得
紫簫吹徹不成腔

來不分明去不言紅椒花露濕粧痕巫娥已隨夢魂斷
十二碧峯愁暮猿

月圍羣芬次第開步前紅露下瑤階擣菹偶共真妃博
賭得雙頭白燕釵

道人寄我紫邏山時復賣藥來人間
缺 渾薄晚有龍鬪
滿谷濕雲無路還

五嶽真官立帳前露蕪香
缺 落瓊筵夜深醮罷各歸去
一一馬聲嘶上天

美人臨水笑相邀自解羅巾擲作橋
同覓雲間仙伴侶
杏花壇上聽吹簫

月帳新開葢輦過桂花涼露洒天河
雙星一夜叙離別
狼籍碧蓮秋露多

又 楊維禎

青旄節衛翠雲輶按部東行過赤城龍女遺珠雞卵大
結為雙珮賜方平

若木西來赤岸東白金城闕碧珠宮天家令急不敢住
折得五花歸飯龍

東逾弱水赤流深夜得桃都息羽旌地底日迴天上出
金雞如鳳自交鳴

金蛾莖生瑤水陰錦駝鳥鳴珠樹林上皇敕賜龍色酒

天樂五雲流玉音

麻姑今夜過青丘玉醴催斟白玉舟莫向外人矜指爪
酒酣為我擘瑩篔

女郎兩兩白玉床對博宛在橘中央青城不賭熊盈襪
閒賭蕭家雙鳳凰

蓮葉舟高河漢垂黃姑玉女會佳期玉清久入衙城洞
莫遣成都賣卜知

道人得道輕骨毛飛度海水能千遭明朝挾至兩浮島

卧看滄洲戲六鰲

青丘書隨雷電亡尚作草木蟲魚荒問渠甲子不能記
但指綠睛雙眼方

天上良常宮又成文章只數老玄卿五雲閣吏亦謫世
牛鬼少年專盛名

日落海門吹鳳匏須臾海水沸如炮船頭處女來聽曲
知是洞庭千歲蛟

當時笑我去學仙汝但求金與求田不知昨夜城頭鶴

問汝無人識墓阡

炮烙詞

炮烙復炮烙是不還是不終殺讒人虎不殺姜中囚

放麋詞

母麋急麋子獵人眎如傷太子奔城父君王赦奮陽

北郭詞

瓜田不納履北郭讒招污履鼎重開日宮中殺破

缺

俠客詞

未許全交死全身報國仇太阿飛出匣欲取賈充頭

劍客詞

丈夫萬人敵拙計晒荆軻昨夜西征去生擒李左車

三閣詞

江南龍虎氣樓閣照金銀望見長安道不知塵污人

摘瓜詞

黃臺八爪熟瓜熟徒綿綿惟有大瓜好瓜來瓜已穿

食桃詞

二桃陷忠勇晏子設危謀半桃陷姑息彌子復誰尤

綠珠詞

井底生明月樓前墜寶星年年金谷草春入美人青

楊柳詞

楊柳董家橋鶯黃幾萬條行人莫到此春色易相撩
長條一丈長長似紫絲韉長條挽易斷五馬過橫塘

擬雪詞


小姑善擬雪擬雪廣寒高剪落孀娥髮紛飛玉兔毛

繫馬詞

誰繫西枝馬馬嘶花亂飛花飛猶自可莫遣折花枝

去妾詞

萬里戎裝去琵琶上錦韉傳來馬上曲猶唱想夫憐



元詩體要卷四